

四庫全書

經部

欽定四庫全書

經部

重訂詩經疑問卷六

詳校官監察御史臣曹錫寶

通政使司副使臣莫瞻菴覆勘

總校官檢討臣何思鈞

校對官中書臣嵇承志

謄錄監生臣胡宗高

欽定四庫全書

重訂詩經疑問卷六

小雅

明 姚舜牧 撰

昊天疾威敷于下土謀猶回遘何日斯沮謀臧不從不
臧覆用我視謀猶亦孔之邛
滄滄訛訛亦孔之哀謀之其臧則具是違謀之不臧則
具是依我視謀猶伊于胡底

我龜既厭不我告猶謀夫孔多是用不集發言盈庭誰敢執其咎如匪行邁謀是用不得于道

哀哉為猶匪先民是程匪大猶是經維邇言是聽維邇言是爭如彼築室于道謀是用不潰于成

國雖靡止或聖或否民雖靡盬或哲或謀或肅或艾如彼流泉無淪胥以敗

不敢暴虎不敢馮河人知其一莫知其他戰戰兢兢如臨深淵如履薄冰

詩序大夫刺幽王也

旻天疾威亦無所歸咎而歸之天也

議論曰謀由是見之施為曰猶故二字並舉而專重於謀此猶字不宜亦解作謀字

察善惡之分致從違之決是人君第一事否則未有不惑于邪謀者詩柄下一惑字一斷字極妙亦孔之丕病在國也即下章所謂淪胥以敗也

回通通字不應訓辟字味文王有聲篇通駿有聲通

求厥寧適觀厥成數適字當是飛疾之意大抵謀猶邪僻而無法度曰回飛疾而不安詳曰適

滄滄而面相和訛訛而背相詆極狀得小人之情態上章謀臧不從二句是罪其君之不斷此章謀之其臧四句是罪其臣之苟同苟同而無定斷此謀猶之所以回適也

洪範曰謀及卿士謀及庶人謀及卜筮易曰人謀鬼謀故詩及龜與謀夫

書曰朕志先定詢謀僉同鬼神其依龜筮協從凡謀
未有不先於定其志者志不先定而謀之鬼龜厭而
不我告矣謀之人盈庭而莫執其咎矣謀之回適端
在此故首章詩柄下斷之一字

不我告猶者不告我以所當為也

酌議必參之衆論主張在決之一人任德亦我任怨亦
我而國是定矣此之謂定謀若謀夫孔多而無主便
各出議論互相推諉未有能善其謀者唐史曰凡此

蔡功惟斷乃成蓋識此旨矣

古今以謀敗者多矣而宋為甚議論多而成功少最
發得此詩之旨

如匪行邁謀二句譬得極好凡謀固欲其行之也必
與行人謀始得所行之路坐謀所適而道安可得乎
之燕而適越無怪其謀之莫定也

哀哉為猶節緊承上說來蓋上章謀夫孔多云云只
說得個謀之莫定尚未及其所以為謀者故此着哀

哉二字傷其所為謀者匪先民大猶之法而唯邇言之從是正首章所為謀臧不從不臧覆用者故復以築室道謀譬言而決其猶之莫成

猶即謀之見於政事者

先民即出大猶之人對舉言者甚言其猶之不歸於法則耳

聽是聽信而不疑爭是爭用而莫奪

如彼築室二句譬言極當蓋凡所謀者欲見之行以為

居也謀築而與行人謀可必其成乎此成字要看得
好成國成也國成一定而不變非國之成即有所為
皆非其可居者焉得成潰決也言決不能成也不應
作遂字解

行道宜與行者謀築室宜與居者謀反是而欲得於
道潰於成未之有也此將二謀字比上之失謀者極
切當

我龜二節通說謀而兩點一猶字是作文之法

國雖靡止節言未嘗無善謀者特上不能用以至於敗耳

聖哲謀肅又五字總謂世有善謀者然細分之聖通明也通明者善謀善斷可以主國謀定國是故於國雖靡止下着或聖或否句哲者知幾可遠謀謀者熟處可定謀肅者慎惕可以無敗謀又者剛決可以成全謀是皆民之俊又也故於民雖靡廬下着或哲或謀或肅或又句或曰聖哲謀肅又雖並舉而謀居其

中謂此詩之旨在謀也語意亦巧聖哲謀肅久是世
之善謀者善謀不從將日向下流而危亡可立待矣
故云如彼流泉無淪胥以敗淪胥以敗在如彼流泉
下此淪字應作沉淪之淪解言無沉淪相胥以至於
敗也

抑篇云肆皇天弗尚如彼流泉無淪胥以亡此云如
彼泉流無淪胥以敗不敬天不擇人未有不淪胥以
至於敗亡者

末章正照前謀字說語意若曰彼妄謀者如暴虎如
馮河豈可妄用哉然謀不可廢也要在主是謀者存
戰兢惕厲之心如臨深如履薄唯臧者之是用耳但
知斥妄謀而不知慎用其善謀此詩之所謂人知其
一不知其他者也孔子曰暴虎馮河死而無悔者吾
不與也必也臨事而懼好謀而成者也其深合此詩之
旨乎大註云云愚未敢以為然敢正高明

首章言謀猶回遘病其君之不善用次章狀小人之

所為謀猶者各以其意而不臧三章承說各為謀者
之不得其道四章承說不得其道者之難底於成五
章表世有善謀者之當用六章教人之用謀者在持
之以兢惕之心

宛彼鳴鳩翰飛戾天我心憂傷念昔先人明發不寐有
懷二人

人之齊聖飲酒溫克彼昏不知壹醉日富各敬爾儀天
命不又

中原有菽庶民采之螟蛉有子蜾蠃負之教誨爾子式穀似之

題彼脊令載飛載鳴我日斯邁而月斯征夙興夜寐無忝爾所生

交交桑扈率場啄粟哀我填寡宜岸宜獄握粟出卜自何能穀

溫溫恭人如集于木惴惴小心如臨于谷戰戰兢兢如履薄水

此兄弟遭亂相戒以免禍之詩然須看有懷二人是其大主意其所努力處在各敬爾儀念昔先人求所為自善之道中原有菽節不是其身去教子蓋念親之所以教我者如此必夙興夜寐如集木臨谷履水若昔先人之所為庶可永承天命而無忝其所生耳以敬身教子對言者恐非此詩之旨敢問高明

以鳴鳩戾天興取努力向上昔先人是昔時之為善者齊聖溫克其人也我心憂傷念昔先人有努力求

進不如其人不已意

凡人不思其親則必不自敬其身思及其親之所以
生我教我若中原有教一節則必以齊聖溫克為師
而不敢同流於彼昏壹醉之習矣此明發不寐有懷
二人其人先見得極分明自說得極透快齊聖溫克
而不困於酒是昔先人敬其身以承天命者壹醉日
富則今時習於酒之昏昏者也各敬爾儀天命不又
兄弟勸各努力敬身效齊聖溫克者之所為則立意

甚佳而其向進亦甚烈矣

壹專一也富加益也四字狀盡淫湎於酒

凡整肅通明的人即當歡懌欵洽時亦知謹飭自謙和而可愛

抑詩云抑抑威儀維德之隅春秋傳曰威儀所以定命也匪敬爾儀其何以脩德而承命讀此詩可以知此人

吾身與天命相對越無時無處可萌一懈心纔一懈

情天命即從此違矣是天命不又之說也要看得細
教誨爾子式穀似之正道二人之所以教我意凡父
母之教子未有不道之以善使與齊聖溫克者而同
歸也

中原節原是說父母之教我故下章緊說到夙興夜
寐無忝爾所生若作我又教其子則上下牽合而文
勢甚寬緩矣凡於此等處要體得真認得切仰視曰
題脊令飛鳴不已起下征邁意

我日斯邁二句似不如此解詩人蓋謂我與而一日
有一日事一月有一月事不可放過當斯邁斯征早
夜以從事云爾故下繫承夙興夜寐無忝爾所生句
日月安可分而我說

無忝所生正應前有懷二人句

前云明發不寐有懷二人此云夙興夜寐無忝爾所
生凡思做好人為父母好兒子斷然朝夕不可以自
懈

桑扈本不食粟也今交交率場而食粟似有橫剝民
脂意若是而民不堪求必罹於刑獄矣故接哀我填
寡宜岸宜獄宜豈宜也若曰民豈宜罹此哉故不自
能穀而握粟以下也

交交桑扈節是於時事難處中求所以自善之計然
其道不在乎他在敬爾儀念昔先人而已故又說溫
溫恭人一節凡與弟各努力小心以自勵

自何能穀正應前式穀似之一穀字言父母教我以

善若斯之殷勤我何自能較而不負父母之厚望也
語語相照應

溫溫恭人節正照前齊聖溫克說見昔先人以此自
善其身以承天之命我亦當若其所為承天命以無
忝其所生也正收拾明發不寐有懷二人意然昔人
溫克我輩當效其所為而彼昏不知壹醉日富亦可
自省矣此詩人言外之意足以風世也溫溫恭人是
成語如集于木而恐墜矣且惴惴小心如臨于谷而

恐隕焉又戰戰兢兢如履薄水而恐陷焉慎而又慎
蓋若斯之至也總之只是一敬字此正實用力以敬
爾儀處

雨無正責羣臣之離居教之各敬爾身此戒人子之
式穀教之各敬爾儀敬之一字真臣子持身之大本
也

弁彼鸞斯歸飛提提民莫不穀我獨于罹何辜于天我
罪伊何心之憂矣云如之何

踽踽周道鞠為茂草我心憂傷惄焉如擣假寐永嘆維
憂用老心之憂矣疢如疾首

維桑與梓必恭敬止靡瞻匪父靡依匪母不屬于毛不
離于裏天之生我我辰安在

苑彼柳斯鳴蜩嘒嘒有漙者淵萑葦淠淠壁言彼舟流不
知所屆心之憂矣不遑假寐

鹿斯之奔維足伎伎雉之朝雝尚求其雌譬彼懷木疾
用無枝心之憂矣寧莫之知

相彼投兔尚或先之行有死人尚或瑾之君子秉心維其忍之心之憂矣涕既隕之

君子信讒如或疇之君子不惠不舒究之伐木椅矣析薪批矣舍彼有罪予之佗矣

莫高匪山莫浚匪泉君子無易由言耳屬于垣無逝我梁無發我笱我躬不閱遑恤我後

詩序刺幽王也太子之傳作焉

提提上着一歸字言小鳥亦知所歸也子非父母之

歸而誰歸哉宜曰獨被廢斥如窮人無所歸故興語
特着此一字乃知聖賢經傳一字必一義不苟下也
罹羅網也于罹正與歸飛對憂在下

何辜於天我罪伊何通是自反之辭父母之不我愛
於我何哉正是此意

此篇以憂字為主子承懼於父母却是何等喜見
棄於父母却是何等憂孟子云唯順於父母可以解
憂則知小弁之憂終身不能解矣

踽踽周道二句不是興宜曰感傷時事知其將必至是也故下緊承我心憂傷惄焉如擣云云晉人云會見銅駝在荆棘中正是此意

此章憂字凡三見如擣憂之至於痛也用老憂之至於哀也疾首憂之至於病也

砧槌物曰擣人有關心事自然痛心夢寐中亦發嗟嘆聲甚者雖少而易老疾莫甚於疾首凡憂之甚者首必見病故詩人歷歷道其苦迫之情

桑梓里居也不必說父母所植

說到不屬于毛不離于裏父母有不動心者乎

我辰安在語意若曰天生一人必有一辰在故各有
所歸我之生辰獨安在而罹此不幸窮無所歸乎
菀彼柳斯六句若謂菀彼柳斯鳴蜩嘒嘒然有漙者
淵萑葦淠淠然一動植之物各有所藉以自若也我
獨若彼舟流而不知所屆乎此心之憂而不遑假寐
也註憂之之深昔猶假寐而今不暇也極善

箋云柳木茂盛則多蟬淵深而旁生萑葦言大者之旁無所不容也甚善

詩緝解鹿斯一章是憂王之孤立也甚善鹿見人則奔宜速矣而伎伎然舒緩者顧其羣也雉朝作而鳴者求其匹也今王黜后而放子元然如傷疾之木內有蠹病而外無附枝也我心之憂如此而王寧莫之知乎冀其感悟也

寧莫之知有作不如無知看者若曰此心之憂寧莫

之知可耳苟一知之而能無痛心切骨者乎此亦有理

幽王之病只是一個忍字忍則不妻其妻不子其子矣此詩人自其所不忍者形其秉心之忍而不覺涕泗之交流也

舒究二字極妙晉驪姬譖太子久矣乃令其祭母而進胙越六日置毒其中令公試之犬死試之小臣死因泣訴太子毒公而公竟不加察賜之以死借其舒

究必知六日之毒非出於太子借其加惠必潛察驪
姬之奸不使其讒之得行也不舒究之上着君子不
惠四字又探本之論

通章心之憂矣凡五見初曰云如之何其詞緩次曰
疚如疾首其痛深三曰不遑假寐則無刻可置之懷
四曰寧莫之知則有生不如其死五曰涕既隕之則
所謂泣盡而繼之以血者也

自苑彼柳斯至此無物不方比而無物之比不足以

動君父之思此方是臣子罕譬納約之義

君子信讒四句一直說下

詩緝據釋文拮從後牽也之文又據錢氏曰拙以手離之之義因解伐木拮矣二句是讒人離間之情蓋木附着於本根伐木者既以斤斧伐之又以繩索從其後牽拽之以倒使絕離其本根析薪者既斧之又以手拙而離之使木析而為二皆喻幽王父子天性本附着聯屬為一體而無柰讒人之橫離絕之也甚

善又按佗即他字王舍彼橫離絕者之有罪反黜逐
太子云舍彼有罪予之佗矣更妙

莫高匪山二句如註所解亦善自愚論之山曰莫高
泉曰莫浚即喻人心之險耳古詞太行之山能摧車
巫峽之水能覆舟意正如此

無逝我梁云云不必作宜白語此四句原出於衛風
蓋棄婦之詞也今申后宜白母子遭逐與此正相類
故宜白引此四句以為煞尾詞極咏嘆而意極深長

今人作詩儘有述古詞以結句者蓋本諸此若作出
宜白口吻便失本意矣

莫高匪山一節是兩截前說人心之險高於山浚於
泉君子無易由言使耳屬于垣者得觀望左右以生
讒此咎其已前事皆言語以為之階也今事已至此矣
我雖思欲善其後而非吾力之所能也我亦如之何
哉故復引古語以深嘆之總是叙哀痛迫切之至情
總是道其憂之莫解意

由言由字不苟下由行也欲行之言也賓筵云匪言
勿言匪由勿語正是此由字

凡人喜一人輕說個如何擡舉怒一人輕說個如何
擺佈在我初沒緊要言之未必實欲見之行也乃彼
之有心者窺見此端日潛於其中逢迎左右以陰助
之陰以行已之私喜怒則此易其言之所召也易曰
亂之生也則言語以為階君不密則失臣臣不密則
失身幾事不密則害成正此之謂也再按詩傳

訣
伯

奇

缺

後

缺

隣大夫閔之賦小弁續說子貢劉向

趙岐皆以此為尹伯奇事是也小序乃曰刺幽王也
太子之傳作焉夫君雖不君臣不可以不臣父雖不
父子不可以不子太子臣且子也其傳何人顧可刺
王且宜白弑逆之賊又安有親親之仁而孟子稱之
孔子作春秋以誅亂賊託始平王其旨深矣豈肯錄
其怨父之辭而不之削乎唯鄰大夫比肩事王則于
吉甫有友道焉朋友責善固其責也申公詩說亦

云尹伯奇為後母所譖而出其隣大夫作此詩以
諷其父吉甫

悠悠昊天曰父母且無罪無辜亂如此憮昊天已威予
慎無罪昊天泰憮予慎無辜

亂之初生僭始既涵亂之又生君子信讒君子如怒亂
庶遄沮君子如祉亂庶遄已

君子屢盟亂是用長君子信盜亂是用暴盜言孔甘亂
是用餒匪其止其惟王之邛

奕奕寢廟君子作之秩秩大猷聖人莫之他人有心予
忖度之躍躍鳧兔遇犬獲之

荏染柔木君子樹之往來行言心焉數之蛇蛇碩言出
自口矣巧言如簧顏之厚矣

彼何人斯居河之麋無拳無勇職為亂階既微且尫
爾勇伊何為猶將多爾居徒幾何

詩序刺厲王也大夫傷於讒故作是詩焉

呼昊天為父母而自鳴其無罪亦無所控告之詞

也

罪與辜意同然二字同出相對似亦少應別按罪从
四从非辜从古从辛宜罪以無故罹其非解辜以有
故受其辛解耶敢問明者

按註憊訓大然憊與𦣻別𦣻從月从無謂無如其月
者宜訓大若憊从𠂇从無其義似謂大無其心者宜
以無情解為是若訓憊為大下泰憊又太大矣似欠
受

凡亂生於讒讒生於君心之不斷故先下僭始既涵
句方及君子信讒句

小人初進微言以嘗試其君正是僭之始不必改僭
為譖易曰臣弑其君子弑其父非一朝一夕之故其
所由來者漸矣由辨之不早辨也正謂僭始之不可
涵也蘓氏小人為讒於其君一段極說得透

君子如怒四句謂君能一辨忠邪慎行其喜怒則讒
無由入而亂可無生矣而惜乎其不能也此是深罪

其君之不明不斷處

君與小人曷嘗有盟哉但就小人之大奸似忠大佞似信處日逐獻款於其君君亦日逐與相要結若盟誓者然是之謂屢盟然小人之所為忠信實好佞之所以禍國者而君不之知也而且日加親任焉故謂之信盜然其情則盜而其言則藹然忠君愛國之嘉謀也孰甘于是而孰不傾信之故又謂之盜言孔甘若君知其盜則不甘之矣小人要結其君之固人

君信任小人之深此章極說得明透

盟則日固而漸肆故承說用長信則恃愛而為奸故承說用暴甘則莫逆而加甚故承說用餒匪其止共正說出小人心事來

止共不但是共其職事內矢於念慮外慎於猷為莫非一敬之肅將此方可當此若就職事說小人之曲謹殆過於君子矣但不是止於共耳此二字當細體註較粗淺

奕奕寢廟二節不是興詩意若曰奕奕寢廟君子作之而不可任之匪人也秩秩大猷聖人莫之而不可謀之匪人也凡所以贊廟謨定國是者皆在其人之一心他人有心予應忖度之而不可以輕信也倘如讒佞者一立於朝即宜加擯斥如犬遇兔免者然則得之矣乃今於柔佞小人不勝廟廊之大任者則培植而作用之於緝緝翩翩往來之行言不足以贊大猷而反禍國者則中心焉親信而數近之曾不思蛇蛇碩

言取辨於其口其於國何如也巧言如簧無所用其
耻其於國又何如也此之謂屢盟而亂用長信盜而
亂用暴孔甘而亂用餒終為維王之邛也愚謂如此
體會庶得詩人之意若註所謂興又比不敢以為是
也

寢廟即宗廟廟中有寢制度奕然故云奕奕寢廟
作造也

大猷即小旻章先民是程之大猷秩秩有經綸次第

也莫謀定也

人藏其心不可測度然就其所為以窺其意向又就意向而察其所安則予可忖度而知者

小人小有才而跳踉以躍躍兔喻極當

國家植材以大用必樹剛直之正人綿力小才如荏染柔木者樹之何益

凡正人君子其建言於朝著必正大光明凡往來君側如十月篇所云嚙齧背憎巷伯篇所云緝緝翩翩

可謂之君子乎行言上加往來二字極狀得小人進言之態出

心焉數之之數即禮記祭不欲䟽亦不欲數之數字義與䟽正相反心焉數之者謂中心焉親任之也錢氏曰數記也謂記憶而不忘也此解亦先得我心矣荏染者樹之則正直者必遠矣往來行言心焉數之則端方辟言必心焉䟽之矣

玩心焉數之四字則君心之眷注小人真有戀戀不

解者易曰君子維有解吉有孚于小人真萬古之龜鑑也

碩言本碩大之言而發之蛇蛇便有委曲轉摺之狀真實由中語決不如是故云出自口矣正月篇云好言自口莠言自口雨無正篇云哀哉不能言匪舌是出則知出自口者讒佞之言也匪舌是出者忠直之言也註謂蛇蛇碩言為善言之出於口吾不信也蛇口花舌而吞吐不可測故此用蛇蛇字

居河之麋必指其所居之處非謂居下濕之地也為
亂者多生於拳勇而彼之生亂專在讒佞之言故云
無拳無勇職為亂階

既微且癘二句承上說蓋極鄙其人之侏儒狀之卑
瑣爾非謂其胥瘍腫足之疾也

為猶將多二句詩人意若曰小人之為謀也祕其為
猶也將滋多矣乃其居御徒衆能有幾何哉特其不
揣涯分而僭始者直究其終是以終為王之印耳此

二句總見小人之說祕其為身家利者無幾乃為
國家害者則甚大所以君子當其僭始時辨之宜早
而遏之宜嚴斷不可涵容之而使之至於若是烈耳
此篇自奕奕寢廟下註俱似未妥愚故歷歷辯之高
明君子幸虛心一裁訂焉得詩人之心於千古之上
彼何人斯其心孔艱胡逝我梁不入我門伊誰云從維
暴之云

二人從行誰為此禍胡逝我梁不入唁我始者不如今

云不我可

彼何人斯胡逝我陳我聞其聲不見其身不愧于人
不畏于天

彼何人斯其為飄風胡不自北胡不自南胡逝我梁祇攬
我心

爾之安行亦不遑舍爾之亟行遑脂爾車壹者之來云
何其盱

爾還而入我心易也還而不入否難知也壹者之來俾

我祇也

伯氏吹壎仲氏吹篪及爾如貫諒不我知出此三物以
詛爾斯

為鬼為蜮則不可得有覩面目視人罔極作此好歌以
極反側

詩序蘓公刺暴公也暴公為卿士而譖蘓公焉蘓公
作是詩以絕之

此詩要見讒人者無面目以見人如鬼蜮之不可測

被譖者始作此詩以絕之中間述梁述陳之說不過
狀其蹤跡之詭秘而實非有此事也再言壹者之來
若謂爾先自絕於我耳我猶欲與爾詛無相疑也而
何爾之罔極若是也好歌以極反側真可謂盡小人
反側之狀使無自立於天地之間

首提彼何人斯便是直指其人後却放寬而原復歸
到彼人身上是縱操責人之法亦縱操作文之法

孔艱二字說盡小人心事凡人正大光明其心必簡

易平直若艱深險阻如飄風之不可測鬼蜮之不可
得則必為小人無疑者首二句是正責之辭胡逝我
梁二句本狀其行止之詭秘然此却就作實說且不
直斥其人而詆其從行者曰維暴之云則其辭婉而
其指則甚直矣

二人從行緊承上說誰為云者姑為疑詞以寬之而
曰不入唁我則必其主謀無疑者是縱之而實擒
之也始者不如今云云若曰爾始者之遇我不如今

日之踈遠也意者爾云不我可故不入言我乎不然而胡其若是忍也如此體來覺得詩人委曲之旨註二句一直說下似太促

復提彼何人斯胡逝我陳見彼不但逝我梁又入我陳矣但無面目見我故聞其聲而不見其人耳爾獨不愧于人乎不畏于天乎此數語發小人良心亦不容昧但意在諧人以自利即所可愧可畏者亦泯滅無存耳不愧二句平說亦可相承說亦可

小人面與人相和背實相詆然欲自掩蔽若非已諧
之者然未嘗不欲至其庭也而良心終不容昧欲行
又且自止焉真有逝梁而不入逝陳而不見一段光
景此詩形容殆盡

又提彼何人斯其為飄風著其人心情靡定蹤跡無
常不南不北而又不實來唁我祇以攬我之心此深
疾而痛恨之詞也

爾之安行節言其往時不一顧我爾還而入節言其

還時不一顧我總承上胡逝我梁說來以見所以攪我心者

壹者之來不獨說一來見我壹者一人之稱也前云二人從行以縱之此兩云壹者之來以擒之使其莫可逃遁

云何其盱望之不至而深致其疑也

我心易也易字作平字看說爾一入我門我心即放平無復疑也

否難知也否字莫放過否不然也即前章云不我可
之謂爾行不來爾還不入必有不然於胷中我難以
識其故也註我不得而知止發得難知意不會發得
否字出

反壹者之來俾我祇也看則其不來為我之怨望也
深矣較上云何其盱為尤甚

前六章通就讒人往來蹤跡之可疑上說以見其情
之可惡伯氏節始以正義責之言已與爾同官于朝

有伯仲之親如壘簏之相應和如繩之貫物相聯屬
尚有不相知者乎諒不我知則願出三物以詛爾斯
矣相知無待於今日相信何待於詛盟若此云者正
責其面和而背詆非同寅協恭和衷之君子也故緊
承為鬼為蜮則不我得云云

諒不我知三句是說我心事可對天日爾不我知我
可出三物以詛爾斯非欲其詛以見諒也

伯仲壘簏是一喻及爾同貫又一喻

此罔極二字與青蠅篇讒人罔極義同曰視人云者
承上有覲面目來若曰為鬼為蜮則不可得耳覲然
亦有面目視人宜明白正大可若是之罔極乎罔極
者言其情之奸惡無底極也故下承說作此好歌以
極反側此二極字正相應言反側之情本無底極我
就爾情之無底極處作此詩以究極之也

萋兮斐兮成是貝錦彼諧人者亦已大甚

哆兮侈兮成是南箕彼諧人者誰適與謀

緝緝翩翩謀欲諧人慎爾言也謂爾不信

捷捷幡幡謀欲諧言宜不爾受既其女遷

驕人好好勞人草草蒼天蒼天視彼驕人矜此勞人

彼諧人者誰適與謀敗彼諧人投畀豺虎豺虎不食投畀
有北有北不受投畀有昊

楊園之道猗于畝丘寺人孟子作為此詩凡百君子敬
而聽之

詩序刺幽王也寺人傷於讒故作是詩

註因萋菲之形而文致之以成貝錦說得是但就下
章哆侈二字看來此萋與菲亦無形者詩人謂諧人
者必說成一片錦然後可聳動得人乃其所云然者
皆是無形影之詞如萋兮菲兮以成之者又做成一
個箕然後可簸揚得人乃其所為爾者皆是自造
作之辭如哆兮侈兮以成之者故下云彼諧人者亦
已大甚誰適與謀若說因萋菲之形文致以成貝
錦將亦說因哆侈之形張大以成此箕耶

大東篇云維南有箕不可以簸揚又云維南有箕載
翕其舌則知必哆張然後成箕成箕乃可以簸揚也
哆者微張之貌侈則大張之謂也

凡諧出於一人其為謀也淺有所以主之者則彼此
造作其為諧也深矣故詩究誰適與謀而下文又重
言之

緝緝二章緊承上謀字說

緝緝者嚴密以入其罪也翩翩者往來以行其奸也

前篇云往來行言正翩翩之意

謀欲諧人者謀欲諧言之人也謀欲諧人必尋覓他人罪往來以行奸故上着緝緝翩翩字面謀欲諧言之人必便利於應對之辭反覆為浸潤之計故上着捷捷幡幡字面

慎爾言也謂爾不信豈不爾受既其女遷皆就後日所必至者而忠告之蓋凡為無情之辭以諧人者終必有時破綻禍反及之所以要慎之於初而勿為

慎爾言也謂爾不信是將後日致人之疑者勸其不為諧非教人慎為諧也要認得明

再按陶其情云慎爾言也謂爾不信豈不爾受既其女遷通是戒被諧者之詞言人方謀諧爾言可以不慎乎且謂爾言不信矣亦豈不爾言之是受乎既其聞諧言而女遷耳故繼以驕人好好即指諧者言勞人草草即指被諧者言於是仰告蒼天何不視察彼驕人之虛妄而矜念此勞人哉亦省得甚好

驕人好好節是無柰彼何要天開眼的話

再提彼諧人者誰適與謀隨欲將此人投畀豺虎有
北昊天蓋痛恨其謀之禍害天下而欲其死亡之
速也所以說惡惡如巷伯

書分北三苗北字正投畀有北北字

上呼蒼天蒼天要天開隻眼此云投畀有昊要天加
之威

楊園之道倚於畝丘即喻下與上相鄰近之意見得

今日譖及於微賤他日即及於大臣凡百君子當敬聽而遏絕之也不是興賤者之言有補於君子註譖始於微賤二句最妙

習習谷風維風及雨將恐將懼維予與女將安將樂女轉棄予

習習谷風維風及顙將恐將懼寘予于懷將安將樂棄予如遺

習習谷風維山崔嵬無草不死無木不萎忘我大德思

我小怨

詩序刺幽王也天下俗薄朋友道絕焉

詩緝云舊說谷風為生長習習為和調今考二章言
維風及頽頽暴風也非和調之類三章言草木萎死
無生長之意其說難通矣是風出自大谷盛怒之風
也又習習然連續不斷繼之以雨行道之人誰堪之
及頽從上而下為焚輪又甚於雨矣維山崔嵬如推
山倒海之勢至草木之萎死又甚於頽矣此統喻當時

變之衝有極難處者唯是朋友共處患難將恐將懼以相與是為大德而不可棄遺且忘者故三章歷言之以見交情之薄惡

彼一時也將恐將懼此一時也將安將樂人情乎人情急則相依緩則相棄甚有置之若遺者故于女轉棄子下着棄子如遺句又甚有修小怨而忘大德者故於棄子如遺下又着忘我大德思我小怨句交情之偷薄蓋從古已然矣

蓼蓼者莪匪我伊蒿哀哀父母生我劬勞

蓼蓼者莪匪我伊蔚哀哀父母生我勞瘁

併之罄矣維壘之耻鮮民之生不如死之久矣無父何
怙無母何恃出則銜恤入則靡至

父兮生我母兮鞠我拊我畜我長我育我顧我復我出
入腹我欲報之德昊天罔極

南山烈烈飄風發發民莫不穀我獨何害

南山律律飄風弗弗民莫不穀我獨不卒

按詩序刺幽王也民人勞苦孝子不得終養爾申公
詩說王室昏亂讒邪肆行其大夫士有沒而不得其
所者孝子痛傷而作是詩今按末章烈烈發發律律
弗弗語昏亂肆行誠有然者此王裒痛恤其父之死
三復流涕而廢卷也若止不得終養豈即至此哉
劬勞者勤劬勞苦也勞瘁者劬勞而至於瘁也

怙怙冒也恃賴恃也銜恤銜念而不忘也靡至如歸
而靡至也

受氣曰生成形曰鞠拊拊循也撫摩抑搔之謂畜畜
養也衣食調變之謂長成長也日夕滋益以望其成
育愛育也煦妯翼庇以致其愛顧即顧視之顧言無
時而不顧也復即往復之復言無往而不復也出入
腹我言一出入常置之懷抱中非止三年懷抱而
已者

此生鞠拊畜數字不過就可舉者數之耳愚所釋
亦不過就此詩數字義稍分別之耳若論父母之恩

勤即就中一字細求之說不盡更着數十字形容之亦說不盡

欲報之德欲以德報其親也

南山烈烈二章非興也南山烈烈似在上之威嚴而律律尤甚飄風發發似致令之迅疾而弗弗尤甚是大有不順乎人情者故孝子卒勞苦而不得終養耳觀四月篇冬日烈烈一章則知此二章決非觸物以起興之辭矣

為人子者常存匪我伊蒿之心則自不敢為匪才以辱其親矣常存昊天罔極之念則自不敢少偷情以終其身矣

有饒簋殮有捄棘七周道如砥其直如矢君子所履小人所視瞻言顧之潛焉出涕

小東大東杼柚其空糾糾葛屨可以履霜佻佻公子行彼周行既往既來使我心疚

有冽沈泉無浸穫薪契契寤歎哀我憚人薪是穫薪尚有冽沈泉無浸穫薪契契寤歎哀我憚人薪是穫薪尚

可載也哀我憚人亦可息也

東人之子職勞不來西人之子祭祭衣服舟人之子熊
羆是裘私人之子百僚是試

或以其酒不以其漿鞞鞞佩璲不以其長維天有漢監
亦有光跂彼織女終日七襄

雖則七襄不成報章睨彼牽牛不以服箱東有啓明西
有長庚有捄天畢載施之行

維南有箕不可以簸揚維北有斗不可以挹酒漿維南

有箕載翕其舌維北有斗西柄之揭

詩序刺亂也東國困於後而傷於財譚大夫作是詩以告病焉

首二句曰興吾不信也興者觸物而起興也簋飧棘匕何見而興周道也註云有饒簋飧則有棣棘匕周道如砥則其直如矢二則字甚無謂愚謂首二句蓋有深意存焉簋飧而曰饒富厚者之所享也棘匕而曰棣流離者之所持也詩人若曰四海之內皆赤子

也王政平直彼此各得分願何至有大相懸絕者稍有不平則必有不得其所者矣故開首即致嘆曰民一也有饑饘殣殍者則必有捋棘匕者蓋勢之所必至也周之道世之所倚以為平不如砥乎平施以惠民其直不宜如矢乎是君子之所履而小人所視以為生者獨柰何不平不直一至此乎所以瞻焉顧之而不覺潛然其出涕也註乃謂棘匕者以棘為匕所以載鼎肉而升之于俎似無所據且謂周道如砥則

其直如矢意義亦不相蒙愚不敢以為是敢問
高明

掇何以訓掇作曲掇掇取也掇取以應急也流離道
塗的人討得碗殘羹剩飯拗取荆棘為匕以應急是
所謂有掇棘匕耳

有饒簋飧有掇棘匕二句正猶今俗語厨中有冷飯
路上有饑人之謂瞻言顧之潛焉出涕正瞻顧此一
段光景所以出涕之不可遏也

凡民之財不過耕與織而已誅求之盡而至於杼柚
其空糾糾葛屨可以履霜佻佻公子行彼周行且既
往而既來無時休息如砥如矢安在哉所履所視安
在哉此使我心疚而不止潛然其出涕者有列沝泉
二句即曹風冽彼下泉浸彼苞稂之意大抵民望
陰雨之膏澤不堪列泉之腴削蘓氏新已獲矣一
段註極佳

契契取交合之義不堪之念交合於胃中要唯寐耳

寤則契契然發之長歎矣

民依於君如赤子之戀慈母也乃不勝其求而稱曰
憚人可哀也哉亦可息也正照前既往既來者不獨
曰東人西人舟人私人而並下之子二字極有深意
蓋當日視東人之供億若以為固然而延及其嗣彼
西人及舟人私人之子自然衣食之豐饒而且有漸
試於僚采者矣觀今日事可識也

東人輸載以徂西必假舟人故說舟人之子熊羆是

裘其所輸納必假私人故說私人之子百僚是試

粲粲衣服熊羆是裘視杼柚其空葛屨履霜者何
如百僚是試鞞鞞佩璲視佻佻公子行彼周行者何
如

或以其酒四句緊承上泛泛說蓋曰西人進益多受
用大將物事不當物事者或以其酒不以其漿固其
所必爾也且輿皂之屬皆得列于冠裳鞞鞞佩璲不
以其長亦其所必至也觀今日之事又可見矣

詩緝將或以其酒四句綴百僚是試下為一章維天
有漢四句綴雖則七襄上為一章極有理

維天有漢以下通是詩人無可控訴之詞意若曰我
東人此情誰能監之要是天能鑒察耳維天有漢監
亦有光矣光獨不能監我乎跂彼織女終日七襄矣
雖則七襄不成報章曾何助我之空於機杼也睨彼
牽牛矣不以報箱曾何助我之疲於輸載也東有啓
明啓日之明謂何西有長庚續日之長謂何載瞻

天畢謂能好雨以潤枯槁也而載施之行有楮謂何
箕則能簸揚矣維南有箕不可以簸揚誰為我去
此弊政也斗則能挹取矣維北有斗不可以挹酒漿
誰為我解此饑渴也毋望簸揚而載翕其舌反若有
所吞噬毋望挹酒漿而西揭之柄反若有所挹取於
東其將若之何哉無可控訴而訴之於天無可歸咎
而歷指東西南北以咎天之垂象者是所謂深於怨
也人疾痛則呼天呼父母是所謂告病之辭

有挾天畢挾字亦取應急之義月離于畢俾滂沱
矣東人職勞不來如枯旱之望雨天畢載施之行安
望其潤澤而挾取哉此詩人字有取義而句有深意
不可草草誤解者

四月維夏六月徂暑先祖匪人胡寧忍予
秋日淒淒百卉具腓亂離瘼矣奚其適歸
冬日烈烈飄風發發民莫不穀我獨何害
山有嘉卉侯栗侯梅廢為殘賊莫知其尤

相彼泉水載清載濁我日構禍曷云能穀
滔滔江漢南國之紀盡瘁以仕寧莫我有
匪鷄匪鳶翰飛戾天匪鱣匪鮪潛逃于淵
山有薺薇隰有杞桋君子作歌維以告哀

詩序大夫刺幽王也在位貪殘下國構禍怨亂並興
焉

四月維夏六月徂暑是自然定序詩意蓋況王政之
日酷一日不能存活也云爾

先祖匪人胡寧忍予是疾痛則呼父母之意

其腓腓字不應作病字解腓足肚也言秋風淒其百
卉之枝葉盡凋敝而唯具存此足幹耳

亂離莫矣云云蓋當此凋殘零落時不能止居而無
所適歸耳此亦根王政來

民莫不穀二句止說已之不勝其害耳若想當時光
景恐無有能自善者正月篇云哿矣富人哀此惸
獨凡詩之作蓋皆就惸獨者言也

四月維夏六月徂暑不勝其酷炎秋日淒淒百卉具
腓不勝其凋悴冬日烈烈飄風發發不勝其凜冽章
章句句有意

易曰大哉乾元萬物資始乃統天一元之氣常流行
於四時君人者應天而時行不驕不伏四時皆春矣
乃或驕陽伏陰如酷暑如淒風如烈寒令民不能自
生息體元之謂何此詩但舉夏秋冬之時而不及春
意深哉意深哉大註夏則暑秋則病冬則烈禍亂日

進無時而息亦極有見

山有嘉卉節緊承上說凡民之所以不勝其酷烈者
由殘賊之臣用於上也山有嘉卉必稱栗與梅矣乃
彼楨幹之臣自廢而為殘賊是誰之尤哉而曾莫之
知哉味莫知其尤語似大學彼為善之意蓋咎其君
之任此人也

廢為殘賊一廢字甚可玩凡仕人國者孰不可為忠
良盡瘁之臣哉然非人之所能與也其人之自立也

一變而為殘為賊又誰從而使之其人之自廢也吾
願世之仕者為忠良毋為殘賊為自立毋自廢
泉水猶時有清濁構禍乃無止息之期其能自存
活哉此穀字與前穀字愚謂應作生息之意解
日構禍云者正照首三章說非遭其酷暴即逢其凄
烈欲解脫而不能也

江漢猶為南國之紀王不能察盡瘁之臣國紀竟安
在哉此民之所以卒受其酷烈之害也

盡瘁二句要看得好此不就盡瘁之臣說就其民望
留此盡瘁之臣說若曰盡瘁以仕之人是調元贊化
於廟堂之上而登斯民於春臺者我民之所庇也為
國之紀者曾不為我眷存此一人乎蓋盡瘁以仕之
人去則廢為殘賊之臣用此民之所為惓惓也寧不
我有云者寧不為我憖留此等臣也云爾

廢為殘賊莫知其尤咎其君之用此人也盡瘁以仕
寧莫我有咎其君之不任此人也此二節正相照應

要深體自得

王者任盡瘁之臣去殘賊之害政行如春而登斯世
於熙熙皞皞之域其民將鳶飛魚躍不知天淵之上
下也任用匪人酷如暑淒如風烈如冬至使民欲奮飛
潛逃而不可得斯世何世哉斯政何政哉斯君何君
哉讀其詩想其時可為掩卷而流涕末章註三則字
無謂詩人意若曰凡物各產其地皆有生意存焉山
有巖薇地有杞桋無有不遂其生者獨奈何民之不

得其所哉此君子作歌而維以告哀也漢文帝詔曰
方春時和羣生之物皆有以自樂吾民獨阡于危亡
而莫之省憂蓋深達斯旨也

曰維以告哀其情何如其可憐也

陟彼北山言采其杞偕偕士子朝夕從事王事靡盬憂
我父母

溥天之下莫非王土率土之濱莫非王臣大夫不均我
從事獨賢

四牡彭彭王事傍傍嘉我未老鮮我方將旅力方剛經
營四方

或燕燕居息或晝瘁事國或息偃在牀或不已于行
或不知叫號或慘慘劬勞或栖遲偃仰或王事鞅掌
或湛樂飲酒或慘慘畏咎或出入風議或靡事不為
偕偕不必作強壯解即所偕行之人也雖曰從事獨賢
然必有同事偕行者故曰偕偕士子朝夕從事

詩本大夫所作乃不刺王而曰大夫自稱為從事是

臣下之禮也

云獨賢者非自稱其賢也維賢任事謂君或以我為獨賢耳

四牡傍傍正言其所為勞者為王事之靡盬也傍傍即旁午之謂

嘉我未老云云正謂我為獨賢處

鮮少也將奉也鮮我方將謂如我將奉得王事者絕少也故獨任我耳旅力方剛經營四方正是方將事

燕燕居息對盡瘁事國言佚勞之不均也息偃在床對不已於行言行止之不均也不知叫號是付之罔聞者慘慘劬勞是靡所控訴者栖遲偃仰是惟意所適者王事鞅掌是莫可解脫者耽樂飲酒何等逸豫慘慘畏咎猶恐其或及之出入風議何等從容靡所不為維日其猶不給北各相為對言而總之則所謂役使之不均也

鞅掌何以作失容解按說文鞅馬頸組也此必控馬

而執在手者一釋手則馬奔而車裂矣總攬國事者亦然故曰王事鞅掌耳如解作失容將謂王事失容乎駟鐵篇云六轡在手是鞅掌之一證

無將大車祇自塵兮無思百憂祇自疢兮

無將大車維塵冥冥無思百憂不出于頻

無將大車維塵雖兮無思百憂祇自重兮

將大車有任重意凡人一身百責萃焉百憂聚焉行役者身勞王事將百責委之於家全在上之人體

恤其情使無內顧之憂耳上不加恤而俾一思之至於
於底不出於類至於重柰何使彼無怨心哉無思云
者正言其思之不能置也易曰說以先民民忘其勞
忘則何事於思而至於底且重哉是以君子讀無將
之詩而知上之人不能以人道使人也

上照註為解耳若詩序則云無將大車大夫悔將小
人也將有推挽意君子推挽小人小人既進則潛害於
君子此亦理之所有者且自塵自底自重字面俱有

自咎推挽之意宜從之

明明上天照臨下土我征徂西至于亢野二月初吉載
離寒暑心之憂矣其毒大苦念彼共人涕零如雨豈不
懷歸畏此罪罟

昔我往矣日月方除曷云其還歲聿云暮念我獨兮
我事孔庶心之憂矣憚我不暇念彼共人惓惓懷顧豈
不懷歸畏此譴怒

昔我往矣日月方奧曷云其還政事愈蹙歲聿云莫

采蕭穫菽心之憂矣自詒伊戚念彼共人興言出宿豈不懷歸畏此反覆

嗟爾君子無恒安處靖共爾位正直是與神之聽之式穀以女

嗟爾君子無恒安息靖共爾位好是正直神之聽之介爾景福

詩序小明大夫悔仕於亂世也仕於亂世則必有勞後而不息者矣則必有安處而不勞者矣故前三章

三言念彼共人後二章再言靖共爾位茲可以得其情矣

共是人臣之盛節此曰念彼共人矣後又望其靖共爾位要見其原未能共也世謂如此者為共人故詩人亦若此稱耳省下畏此罪罟畏此譴怒畏此反覆便可見其為人之實

念彼共人涕零如雨非思念此人而若此其用情也此人之心不可測一念及之不覺其零涕焉蓋畏之

甚也故下緊承云豈不懷歸畏此罪罟

懷歸是人子至情畏罪罟是其不得申情處

罪罟是泛言譴怒是明入之於罪罟也反覆是暗中
之於罪罟也小人情狀之可畏蓋如此

出車云豈不懷歸畏此簡書是臣子肅將之辭讀之
令人生共心此云豈不懷歸畏此罪罟是臣子憚戒
之辭讀之令人生懼心

涕零如雨不言而自傷也瞻瞻懷顧回視而恐反也

興言出宿欲寢而靡寧也茲可以見傷讒畏譏之情
狀矣

若說念彼共人云云是念此僚友而懷歸則矐矐懷
顧下又說豈不懷歸將何以解

念我獨芳便見非衆之所與回邪者交親正直者孤
立蓋自古傷之矣

憚我不暇憚字即大東篇哀我憚人之憚

采蕭穫菽是用以奉祭養老者故歲莫深思及之上

既念且畏之矣至是始嗟嘆而厚望之蓋當時偷安
在內者維恐正直之來形已之短百般設計以遠役
之令不得一日立於朝如伯嚭密啓吳王遣伍員使
齊之類故告之無恒安處無恒安息若曰國家之可
慮者甚多安處安息非所宜也維正直是與而又出
於中心之好乃為靖恭爾位見祐於鬼神耳不然而
惟譴怒之加反覆之譖陷正直於罪罟怡怡然偷處
息之安神寧無奪之鑒益其疾乎蓋勸其從好一

邊可用以獲福則所謂戒且懲者自在其中所謂言之者無罪聞之者足以戒此善言也即此可以見詩人用意之忠厚矣

居處而不遷曰安處息念而不為曰安息

靖共爾位二句一直下重下句凡人臣事君要自靖克共以居其位而非一人之能勝也視人之正直若已有之而維此之是與則以人事君之義也式穀以安以字不作與字解以左右之也言神貽之以穀有若

或相之者

上言正直是與此云好是正直好較與為深所云好者即大學傳其心好之不啻若是其口出也 因世所謂共人者不共爾位而惟正直之妬故兩言靖共爾位要其維正直之與又進之以真好也單一介字訓大可也曰介以景福便有畀予之意註將介與景並訓作大是謂大爾大福矣可乎哉伐木篇論朋友說到神之聽之終和且平此論僚友亦說到神之聽

之式穀以女蓋凡人相與以心此心之神不可欺即
神之所在也人可欺也神之聽可欺乎故惟正直之
與此心可質乎神明雨無正云胡不相畏不畏於天
何人斯云不愧于人不畏于天皆神之聽之之意

鼓鐘將將淮水湯湯憂心且傷淑人君子懷允不忘

鼓鐘喈喈淮水潏潏憂心且悲淑人君子其德不回

鼓鐘伐磬淮有三洲憂心且妯淑人君子其德不猶

鼓鐘欽欽鼓瑟鼓琴笙磬同音以雅以南以簫不僭

按詩序鼓鐘刺幽王也

鼓鐘鼓字是虛字即鼓瑟鼓琴之謂

淑人君子是古先王之勤政子民者懷允不忘懷思
信允而不忘愛民之心也愛民則樂而有節矣註憂
傷而思古之君子不能忘非是

將將聲之剽而疾也嗒嗒聲之混而雜也湯湯水盛
而汪洋潛潛水流而淫佚傷傷悼也悲痛悲也各稍
別妯从女从由女子由中生者固結不解又不但傷

悲而已也訓動字似未妥

其德不回其德不猶何德也君德只是一個愛民存愛民之心自然不回邪不夷猶為流連荒亡之樂

詩中用猶字甚多其義各別如小星之實命不猶宜作相似解采芑之克壯其猶宜作威略解小旻之謀猶回適宜作作為解斯干之無相猶矣宜作狼惡解此之其德不猶宜作夷猶解蓋猶本獸名其形相似其力甚威其能有為其性甚狠喜則夷夷故稱夷

猶疑則豫豫故稱猶豫讀者當隨其文義求之一
槩解作似也圖也便不是

末章不應與上三章同省上云淑人君子懷允不忘
其德不回其德不猶便見有不僭之意僭妄用也鼓
鐘欽欽而比之以琴瑟諧之以笙磬奏必以雅南而
舞必以籥清廟明堂之音用之清廟明堂之上是之
謂不僭若用之淮上為流連之樂是僭也可謂人則
是而樂則非乎敢問高明

重訂詩經疑問卷六